


5526/7163

CHINESE-JAPANESE LIBRARY
HARVARD-YENCHING INSTITUTE
AT HARVARD UNIVERSITY

OCT 11 1961




雙
暉
鏞

生
詞
仲

汀州伊念曾

咸豐中庚子十月
香林浩氏開齋





緝雅堂詩話則一

南海潘衍桐繹琴

媚川夫人爲儀徵相公女孫幼工詩律長精
琴理又能通毛傳大義幽嫺淑慎不媿門風
福慧無年蕙蘭早折檢錄遺稟工秀特絕此
詠絮才也

按緝雅堂詩話爲公督學時編輯兩

浙輶軒續錄所著而繫於各家小傳之

後者 公錄夫人慈暉館詩凡十二首
其編次則卷五十有四云

光緒壬辰三月媼侍生陳豪識



慈暉館主人傳 兄阮恩海南曩撰

妹名思灤字媚川先文達公第三女孫先清
河公第三女也妹生時清河公官永平知府
府城外爲灤河古灤水也故名妹生三歲清
河公卽棄養幼而凝重明敏十歲許聘武林
沈蓮叔直指公第八子名麟元字竹齋今杭
郡增廣生也咸豐壬子四月竹齋來揚贅於

余家妹年二十有二五月偕竹齋歸甫抵浙而直指公薨妹衰經入門哭泣盡禮事君姑能先意承志姑偶有小恙衣不解帶以是得君姑歡明年二月將歸甯而揚城陷余先於正月侍母挈眷移居北湖公道橋實僧渡橋也妹以吾母年逾六旬不勝轉徙之苦且道橋距揚城僅五十里危幕堪虞兼之傳聞異

詞致駭物聽潤州金陵先揚州而陷江南北
梗塞更無從覓寄書郵憂鬱驚悸心脾俱傷
致疾之由已伏于此三月大兵雲集道路漸
通妹與竹齋專人至道橋省視吾母伴返知
吾母尙清健以次悉無恙始轉悲爲喜厥後
雖魚鴻不絕然每一拆牘一械札未嘗不泣
然流涕而三復河廣之章也甲寅四月患咽

痛醫投以散藥而病轉劇乃陰謂竹齋使密
札余又恐傷母心囑勿稟書至而余以襄辨
善後先二日之揚城吾母得此書益焦灼急
欲治裝親往余聞此耗力疾返道橋隨侍赴
浙于六月十一日抵武林相見後悲喜交集
如隔世歡妹時臥牀一月餘矣猶謂患難之
秋而母女兄妹尙能聚首或積鬱少解葭朮

賴以有靈不意氣體久虧幻痰爲虐竟於七月二十巳時棄世當彌留時語余曰病不起矣其如慈母何語竹齋曰必以素服斂蓋直指公薨於壬子五月制未終也嗚呼孝矣賢矣妹性敦厚舉動必循禮遇貞烈節孝事尤樂道不厭耽詩書解音律詩詞亦韶秀然不盡留稿今稿之存者僅十之半又癖嗜琴其

最工者爲關雎普庵猗蘭梅花平沙塞鴻諸
操有揮送之態先文達公偶至選樓必令一
彈再鼓顧而生歡呼之曰琴女孫且手書楹
聯以賜云古琴百衲彈清散名帖雙鉤搨硬
黃自偕竹齋歸後以在制未嘗奏安世樂然
伉儷相愛敬一室之內翕如也肅如也嗚呼
吾妹竟長逝耶回憶妹在室時遇花辰月夕

余攜琴笛各一與五弟起臣內子華琳暨妹
共四人更唱迭和不知燭跋更闌可謂極天
倫之樂盡人事之歡矣顧以昔視今滄桑迥
異能勿悲哉嗟乎竹齋與妹梁孟也竹齋之
傷悼何待言獨念吾母千里來御今轉以哭
臨歸歸途其何以慰耶靈而有知得毋遺憾
於九原也乎時維咸豐四年閏七月上浣三

							日
--	--	--	--	--	--	--	---

序

媚川夫人青琴儷芳玉李降耀白太傅之家
世篤生金鑾李文叔之著述紹有漱玉璇錦
在握神珠湛胸夢披玉衣華鬢證其仙果才
豔香茗彤管煒其清輝以騎鶴之名區贅乘
龍之佳壻劉家姊妹媿媿成行叔姬伉儷雙
雙俱至匪徒兩美必合抑亦三生奇覲者矣

時則揚蒜渡之舫返柳浦之驛六朝山黛翠
落眉籛十里瓊花香霏繭楮敲玉釵而刻燭
鞞鑑圖開書練裙以代箋珍珠字小加以綠
綺在御雙聲競陳金荃掇華九變復貫同同
者鳥育育乎魚斷鐵躍夫蕤賓名香薦之熏
陸奉光儀則才驚徐淑慕仙耦而福妒劉綱
固宜月有長圓花無離恨何意狐鳴社警賦

感蕪城燕巢幕危徙空吳會羽書馳驛而去
木杪蔽江而來夫人望天南之白雲悲塞北
之黃鵠思歸之操空撫近淚之土不乾殺賊
心雄未遂木蘭之志飛龍骨瘦竟貽藁礎之
憂逮至破冢回船布帆無恙板輿入舍華髮
依然而海山之靈藥無徵塵世之彩雲不駐
天乎此酷人何以堪觀其金井梧桐之吟珠

湖綠柳之句龍沙入夢草有紅心鵲血成波
墨無華色采薇鹿祐難問元穹傳書鶴來遽
歸閩苑可以欽其行之孝矣可以憫其志之
悲矣嗟嗟太上忘情誰能遣此美人曼壽振
古爲難六如亭中幻塵緣於泡影九市天上
迷法界於華嚴不畱文豹之皮難挽驚鴻之
跡于是彩毫公子繪南嶽眞圖蘭臺阿兄作

道韞小傳徧按蓋篋塵網瑤華載索弁言詞
標黃絹綴玉臺之序我愧徐陵鐫盤中之詩
君眞伯玉

咸豐四年仲冬之月韻梅張景祁撰

序

慈暉館主人既逝世吾姪竹齋茂才哀其遺
詩如千首詩餘如千闕將壽諸棗梨問序於
余啓而讀之篇什雖隘而纏緜悱惻之懷清
遠雋上之致固已挹之而無窮味之而不厭
自非夙有稟承未易轅斯壺域也及晤其兄
南畝主政於吳門則知少受詩於母氏劉太

夫人六歲卽通毛詩大義嗣乃熟精於古詩
源旁及唐宋諸家流覽殆徧無不窺其堂奧
稍長兼精琴理吾師 文達公每至選樓必
令鼓一再行以佐歡讌於女孫中別呼爲琴
女孫夫琴之與詩同出一原古人歌頌皆可
被之管絃故有工詩而不習琴者矣未有善
琴而不深於詩者也性情所發時而託諸絲

桐亦時而傳諸諸詠凡以其天真獨粹是以
隨所杼寫而各極其致也惜乎天不祚年遽
焉凋謝檢其書篋只此吉光片羽爲可悲也
然光氣已不可磨滅矣

咸豐甲寅九月上澣子菜兆霖撰

予婦慈暉館主少聰穎善鼓琴兼解吟諷

先大夫宦揚時爲予委禽時予年猶未冠也

洎咸豐壬子余奉先大夫命親迎於邗來

歸後遽嬰風木之痛婦髻紒擗踊哭泣盡哀

戚鄰咸稱其孝居亡何粵氛不靖蹂躪江南

北金陵維揚以次陷川陸道梗不得一紙書

南望白雲無時不神馳千里也由是方寸結

輶不能已已輒復寄諸謠詠予以憂能傷人
止勿嘔思每謂予曰詩者思也記有之應感
起物而動然後心術形焉陟屺采薇每多苦
調動於中者不自知耳嗣後屬橐輒毀不令
予見予亦不欲傷其意也今歲首夏患咽痛
纏綿藥裹者累月陽虧靈宅竟以不起嗚呼
傷哉婦亡後搜其蓋篋遺稿散佚存者僅十

之半彙而錄之得詩詞若干篇內兄範書大
令屬壽諸梓子不忍拒明知巴歛里唱無當
雅裁而哀悼之忱或藉以少慰九原有知其
將笑予爲詒癡否乎

咸豐甲寅閏七月武林沈麟元竹齋甫識

--	--	--	--	--	--	--	--	--

題辭

謹次 阮文達公題女蘿亭詞卷韻奉

題一律

魏謙升 滋伯

良緣太短惜匆匆絕似優曇現鏡中詩思芙蓉麗初日琴心梧葉舞秋風韋平家世天姿貴謝鮑才華古媛同惆悵瘦腰人悼儷一編

悽對玉玲瓏

庾園有奇石名玉玲瓏余昔題一詩

楊錦雯
晚嵐

新詩骨秀本裁花未許清芬擅左家況有香

詞追漱玉琴言譜入茜窗紗

徵題有句記新圖一現曇花不再蘇
夫人有橫琴坐

月圖余才大紅塵難久住定修瑤史返仙都
曾譜詞

蔣坦
藹卿

青天碧海思茫茫春入仙山夢不長今日小

鸞無處所人間但有返生香

簾卷西風月似煙房中無復舊琴絃傷心一曲離鸞調絲網塵蒙近一年

王堃 小鐵

錦瑟華年廿四春羽衣仙侶證前身琴心解脫曾真慧詩格纏絲筆有神鳳管風悽畱賸翰蠶筴月冷黯香塵傷心奉倩搜遺稿卒讀

何堪淚滿巾

吳受藻
顧蘅

廿年彤管播芳型
詠絮曾趨謝傅庭
若把琴心證詩格
高山流水獨泠泠

鼙鼓聲高動地來
夢魂飛不過蘇臺
傷心一曲揚州慢
傳到人間劇可哀

病骨纏絲歲一周
彩雲吹散月華流
廣陵從

此無人繼絕調空聞在選樓

替吟白燭恨難消檢點叢殘百不聊畱得一
編香茗在閒愁瘦卻沈郎腰

應寶時 敏齋

李家金石伏家經都付風花奪脆齡愁煞阮
公墩上樹年年青護瘞琴銘

雪珠如豆敲庭竹一點孤燈凍不紅料得近

來荀奉倩夢魂冰透玉瓊瓏

庾園玉玲瓏石
宣和花綱石也

萬劫誰知故劍存迴腸割斷斷情根
憐君翻笑君多事何苦重尋舊墨痕

高望曾

茶庵

一編塵黯翠螺妝花韻簾前總斷腸
惆悵東陽瘦腰客卻從緗篋檢詩囊

蘭言霏玉妙無論紙上摩挲見粉痕
回首揚

州二分月烽烟滿地黯吟魂

江城子

張應昌 寄庵

松風水月韻悖悖是琴心是仙心珮戛飛瓊
吹下步虛音身自蕊珠宮裏謫畱一卷鶴鸞
吟

高陽臺

方 隲 雲泉

月冷紋窗香消翠縷凝塵積滿湘弦人去幃

空柔腸已斷經年除芥夢裏相逢乍柰鰥魚
醒枕難眠近闌干一搦腰肢垂柳風前行
吟都是傷心地祇篋篋管戛玉疑佩珊珊粉盞
脂箱零星怕拾遺篇簪花瘦格叢殘稿總唬
鵑血灑成斑惹情牽暝寫晨鈔愁損朱顏

壺中天

戴賡保 勉齋

瓊簫聲咽判相逢再世秦臺恩眷一種閑愁

無著處落葉半庭吹滿月冷蟾光琴寒鳳軫

舊夢如煙軟

夫人有橫琴坐月圖

玲瓏閣小石邊幰影

空卷誰念冰雪聰明華年廿四花信風吹

斷縱有零縑遺墨在難補芝芙夢短淚灑啼
鵑魂悲化鶴同抱青山怨選樓何許恨他天
遠人遠

高陽臺

王起
硯香

蠹粉香沈鮫綃帳掩壺中紅淚偷彈冷落妝
臺瑤編珍重相看冰絃曲斷瀟湘月瘦郎腰
悶倚闌干夢珊珊絮果蘭因都付毫端 聰
明自證金閨福柰懷兄憶母翠袖愁單露草
煙榛淒涼日送家山雙鸞莫剃眉峯恨悵鏡
兒空照孤鸞最心酸小字簪花怕讀燈殘

閨秀題辭

齊天樂

吳藻

蘋香

謝家門第天人貴風姿綽然林下碧幌絃琴
瑤編印粉跨鶴揚州曾迂高吟和寡歎香茗
詞工玉臺誰亞石倚玲瓏庾公樓畔好亭榭
無端烽火照眼白雲巖半杳凝望親舍寸
草慈暉空花幻艸愁滿秋燈涼夜卽腰瘦也

可重檢眉斂舊題羅幘錦瑟華年杜鵑餘淚
瀉

虞美人

鮑靚 玉士

鹽梅門第調羹乍別夢縈親舍高樓目斷苦
疑思紅了疎梅碧柳又絲絲 竹欄花隴閒
題記好景何曾廢是仙是佛漫參詳且駕鸞
輶還返白雲鄉

清平樂

關 鏜 秋 芙

畫屏秋遠殘夢兜衾短風落落瑤箋詩一斗和
雨和塵吹滿 隔簾彈冷琴聲小樓收了秋
燈不及多情芳草春來還肯重生

感皇恩

沈允慎 湘濤

月冷謝庭空瑤琴聲斷縹緲仙雲碧城遠塵
緣如夢虛說齊眉曾願春歸花落易韶光短

昔憶江南頻拈湘管淚滴思親翠箋滿詞
工漱玉遺向天涯人羨清才深不愧名門媛

減字木蘭花

高 茹 子柔

家山何在滿眼風波成恨海鎮日相思併入
齷辛幼婦詞 水仙渺矣環珮依稀殘夢裏
香影蘅蕪遺得橫琴坐月圖

齊天樂

次蘋香夫人韻

許延祜

雲林

十年鴻雪邗江住相逢選樓樓下小字珠含
芳姿玉映佳壻乘龍來迓青琴調寡是韋貫
紅妝擘絃能亞詠絮吟成韻流松石古池榭

鄉關旋警燕幕小邨同避地暎隔茅舍

癸丑

三月予避兵新城媚川亦隨侍
踵至鄉隅相隔終未得一見靜樹烏啼寒

潮鯉訊難慰椒窗晨夜鸞笙去也歎一霎西
風頓薦桃吧漫展瑤編麝丸和淚瀉

--	--	--	--	--	--	--	--

